

Mbanjnazseng Denzyangz Yen:

Aen Mbanj Moq Gyaeundei Gvaq Hawsingz

“比城市还漂亮的新村”——田阳县那生屯

Vangz Cwngzboh

Vunzmbanj hwnj ranzlaeuz, baenz youq caiq ndei yawj.

Denzyangz Yen Bwzyuz Cin Swnaz Cunh Mbanjnazseng, dieg youq ndaw Baksak Guekgya Yendai Nungzyez Gohgiyenz, baihaek dep Byagamjcuengh, baihamz gyawj Baeuqroxdoh Mangzgoj Funghcingz-yenz, liz yienhsingz Denzyangz 12 goengleix gyae. Aen mbanj neix ing bya dep raemx, bya heu raemx saw, faemak baenz doengh, gingjsaek byaraemx doenghnaz gyaeundei yinxvunz, hekyouz cungj haengj bae gizde sawq gvaq gij saedcej lajmbanj cwxciah simsoeng haenx.

Mbanjnazseng miz 3 aen cunhminz siujcuj, gungh 146 ranz 604 vunz, 2006 nienz ndaej lied guh Baksak Si seveicujyi lajmbanj moq hwnjguh sawqdiemj, bang de hwnghat byaekdoeng byaekcou nem ndaem-ganq mangzgoj caeuq nungzyahloz lijyouz, cauxguh aen mbanj moq swnghdai nungzyez ngonzyawj caeuq nungzyahloz lijyouz doxcaemh guh ndeu. Lai bi gvaqdaej, vunzlai Mbanjnazseng caezsim roengzrengz, it dwg baengh gij ndeicawq nungzyez gohgiyenz dingh youq ranghdieng ndaw mbanj banh de, hwnghat gauhyau swnghdai youhciz nungzyez, lai ndaem mangzgoj, byaekdoeng byaekcou caeuq gomak, gonqlaeng

banh hwnj le suenmbaetsou makit, mangzgoj sifanyenz daengj ndaem-ganq gihdi, baenz ndaw mbanj aen canjyez ceiq hung ndeu; ngeih dwg daj 2008 nienz gvaqdaej, ndaw mbanj giethab hong hwnjguh mbanj moq, roengzngaenz guh nungzyahloz cwxciah lijyouz canjyez, seizneix daengx mbanj gaenq miz 14 ranz vunz guh nungzyahloz lijyouz dakdaih, moix bi daih hek 10 fanh lai vunz, lijyouz souhaej dabdaengz 100 fanh maenz, hawj nungzminz lai le diuz roen moq demsou ndeu. 2013 nienz, daengx mbanj moix vunz bingzyaenz cinghsouhaej dabdaengz 10281 maenz.

Mbanjnazseng youq dangiveij cwngfuj baihgwnz caeuq sevei gak gyaiq haenqrengz bangcoengh lajde, doihengz aen moysi “doxcaemh gveihva, doxcaemh sezgi, doxcaemh hwnjguh, doxcaemh guenleix” neix, hemqcomz vunzlai camgya hwnjguh, daengx mbanj gungh hwnj ranzlaeuz moq 30 ranz, miz 17 ranz gaj guh ranz gaeuq, cek senj ranzvaih mienhcik dabdaengz 13800 bingz-fanghmij, miz 130 ranz dajbae rogiengz aenranz gungh 3.2 fanh bingzfanghmij; ndaw mbanj caemh hwnjguh le laeuzcunghab, laeuz-sonhag siujyoz, lanzgiuzcangz,

miengbaizraemx, roengngomx-mbanj, daengloh, sienqdienh gyongj-raemx haem lajnamh, ndaem faex ganq va daengj, caemhcaih guh le aen caujgiciz hung ndaej hawj 30 lai ranz vunz dajcawj ronghdaeng ndeu caeuq 53 aen ranzdog caujgiciz, boiqdauq “sam gai” 30 ranz, hawj ndaw mbanj ranzlaeuz baenz coij baenz baiz, roenmbanj gvangq youq bingz, laeng ranz faemak heuswd homftw, naj ranz gova anghai ndei yawj, gyoengq hekyouz caeuq gak giz gicej bae yawj le deiheih haenh naeuz dwg aen “mbanj moq gyaeundei gvaq hawsingz” ndeu. Doengzseiz, ndaw mbanj lij laeb miz vwnzyidui, gag bien gag yienj gij vwnzyi cezmuuz vunzlai gyaez yawj haenx, hawj gij vwnzva swnghhoz vunzlai engq lai cungj lai yiengh, ndaej coicaenh doxgiet doxhuz, daezsang le vunzlai vwnzmingz suciz.

2008 nienz, Guekgya Nungzyezbu dingh Mbanjnazseng guh daengx guek lajmbanj vunzcaiz saedyungh beizyin gihdi, moix bi banh gak loih beizyinbanh 10 geiz doxhwnj; 2009 nienz 12 nyied Mbanjnazseng ndaej aen mingzdaez ndei “Guengjsae Cib Aen Mbanj Ceiq Hoengh Ceiq Yinxvunz” neix.



▲ Youq gwnz ban beizyin, vunzlai nyinhcaen dingq.



▲ Ndaej dingh guh beizyin gihdi, beizyin bibi cungj lai banh.



▲ Genj cang makyungz daeh bae gai, souhaej demlai vunz sim'angq.



▲ Vunzmbanj comz baet roen, ngoenzngoenz cungj seuqcingh.



▲ Yawj aenmbanj gyaeundei, hek-youz deihdieh haenh.



▶ Caujgiciz hung bienh vunzlai, henhoh swnghdai daengx mbanj hoengh.



▲ Doengxngoenz guh reih-naz, haemh ma caiq yienjheiq.